


SEAHATCH TA SPERA DI EXPANDE EXPORTACION DI CABARON PA CINCUENTA MIYON LARVA PA LUNA



ORANJESTAD(AAN): -- E compania di cria larva di cabaron Seahatch NV a adkeri su propio avion recientemente, y siman pasa a cuminsa bula cu ne.

Den e conferencia di prensa na ocasion di prome vuelo di e avion, director di Seahatch J.W. van der Valk a splica tocante su compania y encuanto cria di larva di cabaron.

Na e momento aki, Seahatch ta exporta binti miyon larva di cabaron pa luna pa paisnan manera Mexico, Nicaragua, Honduras, Republica Dominicana, Suriname y Venezuela.

Durante e conferencia di prensa, señor Van der Valk a bisa cu e intencion ta pa expande e cantidad di larva cu e compania ta exporta pa cincuenta miyon larva pa luna.

Seahatch ta yiu di Super Shrimp, e compania di mas grandi di exporta larva di cabaron na Norteamerica y Suramerica.

Na 1997, Super Shrimp a produci no menos cu un biyon larva.

Riba foto hunto cu e articulo, ta mira señor Van der Valk cu un di e cahanan den cual e larvanan ta wordo transporta.

E larvanan di cabaron ta wordo hinca den saconan di plastic yena cu awa di lama frio, cu ta wordo poni den e tipo di cahanan aki, cualnan ta fura di paden cu styrofoam.

E styrofoam ta pa tene e awa frio, loke ta importante

pa e larvanan yega nan destinacion sano y salvo.

Te na e momento aki, asina señor Van der Valk a bisa,

Seahatch no ta produci su propio webonan di cabaron.

E compania ta haya e webonan desde Venezuela y ta cria nan te nan yega e fase di larva.

Dentro di corto sinembargo, Seahatch lo ta cla pa ricibi parehanan di cabaron cu lo cuminsa produci webo na Aruba tambe.

Señor Van der Valk ta spera cu den tres luna, su compania lo ta asina leu cu e ta percursa pa su mes webonan.

Pa un cabaron yega den e fase di larva, e tin cu pasa den diferente stadia.

E webonan ta drumi pa varios dia den e tankinan grandi di Seahatch na Savaneta, prome cu nan yega den e fase di "nauplius".

Ora nan ta den e fase di nauplius, nan no ta parce cabaron pa nada.

Den e fase ey, nan curpanan ta completamente diferente for di esun di un cabaron adulto.

Ta te ora nan alcanza fase di larva, nan ta cuminsa parce cabaron, numa di tamaño microscopico.

Un larva di cabaron ta midi unicamente ocho pa diez milimetro largo!

Den e conferencia di prensa, director di Seahatch a papia tambe tocante con limpi y higienico un compania di cria di larva mester traha.

Como cu ta trata cu bestianan bibo, Seahatch ta dray binticuatro ora pa dia, caminda ta controla e animalnan tres biaha pa dia y tres biaha pa anochi.

Di cada grupo di larva cu Seahatch cria, ta saca un grupo di sample cu ta sigui lanta te nan bira cabaron adulto.

Una vez e bestianan ta grandi, ta manda nan pa un laboratorio na Merca na unda nan ta wordo getest riba

malesanan di bacteria o di virus cu cabaronnan por sufrir di dje.

Si nan ta salu y limpi di malesa, Seahatch ta haya un certificado cu ta bisa asina.

Diariamente, Seahatch ta controla e bakinan di larva di cabaron pa beskemnan y bacterianan.

Sa socede por ehempel, cu beskemnan ta crece den e awa y riba e bestianan.

Si ta trata di un infeccion chikito di beskem, ta basha cierto antibioticanan den awa cu ta remedia e problema aki.

Sinembargo, sa pasa tambe cu e infeccion ta dje grandi ey cu no por haci nada otro cu basha chloro den awa, mata tur larva, saca e awa y cuminsa di nobo.

Señor Van der Valk ta bisa cu como cu e bestianan ta asina microscopicamente chikito, ta imposible pa trata nan un pa un ora nan ta malo y por ehempel, purba pa injecta nan cu remedi.

Esaki ta e motibo tambe cu ta controla tanto biaha pa

dia.

Si catch e infeccion di beskem na tempo, ainda por haci algo, si no, no ta keda otro cu sacrifica e bestianan.

Ora a puntra señor Van der Valk pa kico Seahatch no ta cria e cabaronnan te nan ta grandi y cla pa come, el a splica cu na Aruba no tin suficiente espacio pa haci esaki.

Un di e companianan na Venezuela cu ta importa larva desde Aruba por ehempel, tin un tereno riba lama di 600 hectare pa cria cabaron grandi.

Un compania na Mexico cu tambe ta importa larva di Seahatch, tin 1400 hectare di lama na su disposicion.

Señor Van der Valk ta kere cu dia e yega na gobierno di Aruba y pidi pa 900 hectare di lama, nan lo puntre si su cabez no ta bon.

Na Aruba simplemente no tin e cantidad di tereno cu e lo mester.

Actualmente, Seahatch tin dos aña ta exporta larva di cabaron.

E compania a lanta na 1995 como test y cu sosten di Departamento di Cria, Pesca y Agricultura.

Van der Valk ta spera cu su compania lo ta completamente madura aki cuatro luna.

Na Aeropuerto Reina Beatrix, Seahatch ta representa pa Cargo Servicecenter -encarga cu e parti di cargo- y General Air Services -encarga cu e parti di ground-handling.

Na final di e conferencia di prensa, director di Seahatch NV a gradici no solamente e dos companianan cu e ta traha cu ne pero tambe tur autoridad cu e tin di haber cu ne, especialmente Adouana y Imigracion, di kendenan e no a haya nada otro cu cooperacion semper.

E avion di Seahatch lo ta registra na Aruba.

Hopi problema pa detene un solo ilegal

ORANJESTAD (AAN): Polis a ricibi un tip cu den un restaurant situa den Caya Ernesto Petrona, lo mester tin un muher trahando sin documento necesario. Patruya a worde dirigi na e restaurant encuestacion pa averigua e informe aki.

E supuesto señora mes no tabata tey, pero durante di e control un di e agentenan a nota un homber ta trata di sali na un forma sospechoso for di establecimiento. E agente no a confia e actuacion y a bay tras di e homber. Prome cu e homber por a move cu su auto, un di e agentenan a pidi e chofer pa documento.

E homber tabata tin un licencia temporal pa maneha. Lo demas documento esta di estadia y di trabao e homber

aki no tabata tin den su poder. No a keda e agente nada otro pa detene e compay aki. Pero nada den bida ta bay facil.

Un otro agente a presenta cu boei y esaki a pone e sospechoso cuminsa resisti fuertemente. Na dado momento e sospechoso a sak, lanta para y core bay. Mucho leu e no por a yega ya cu e agentenan a sali su tras y a logra gare. Un biaha mas e sospechoso a resisti pa por a kibra su forza mester a usa un tik di clup. Esaki tabata tin su efecto y a kibra resistencia di e sospechoso di inicial V.R.P.

Na Warda di Polis, Fiscal auxiliar a cay den e asunto aki y a ordena pa detene. Mas despues a entrega e detenido na despacho di Inmigracion.

OPENBARE VERKOOP

Op donderdag, zestiën (16) april 1998, des voormiddags om 11:00 uur zal ondergetekende, duerwaarder bij het Gerecht op Aruba, ivergaan tot de openbare verkoop van:

EEN PARTIJ SCHOENEN EN DAMES

HAARARTIKELEN

welke zich bevinden aan de Wilhelminastraat nr. 63 op Aruba en aldaar aan (1) uur voor de verkoop zijn te bezichtigen.

Voormeld openbare verkoop zal geschieden bij opbod en tegen gerede betaling.

Sigrid J.B. Torres,
duerwaarder